



No. Ruj.: DOF.UKK.100-9/1/1 (71)

SIARAN MEDIA

KAPAL LATIHAN BAHARU PERKUKUH TVET PERIKANAN NEGARA

LIMBUNGAN, 21 Mei 2026 – Ketua Setiausaha Kementerian Pertanian dan Keterjaminan Makanan (KPKM), Datuk Seri Isham Ishak hari ini melancarkan kapal latihan baharu Kolej Perikanan Sultan Nazrin Muizzuddin Shah (KPSN) sebagai langkah strategik memperkukuhkan pembangunan modal insan sektor perikanan negara serta menyokong agenda keterjaminan makanan negara.

Kapal latihan sepanjang 26 meter yang dibina oleh MSET Shipbuilding Corporation Sdn. Bhd. itu melibatkan kos RM9.288 juta di bawah peruntukan Rancangan Malaysia Kedua Belas (RMKe-12) dan bakal menjadi platform utama bagi latihan praktikal utama dalam usaha melahirkan tenaga kerja perikanan tempatan yang mahir, kompeten dan memenuhi keperluan industri perikanan moden negara.

Menurut Datuk Seri Isham, pelancaran aset strategik tersebut selaras dengan aspirasi Dasar Agromakanan Negara 2.0 (DAN 2.0) Teras 3 yang memberi fokus dalam mentransformasikan sektor agromakanan negara menjadi industri yang mampan, berdaya tahan, dan berteknologi tinggi melalui pembangunan bakat yang memenuhi permintaan industri. Pelaksanaan pelan ini dijayakan menerusi Program Pendidikan dan Latihan Teknikal dan Vokasional (TVET) Pertanian yang melibatkan golongan belia dalam sektor pertanian agar sektor ini terus berdaya maju selari dengan peredaran zaman.

“Sektor perikanan tangkapan kekal menjadi antara penyumbang utama bekalan ikan negara dengan pengeluaran melebihi 1.2 juta tan metrik setahun. Justeru, pembangunan modal insan berkemahiran tinggi amat penting bagi memastikan sektor ini terus mampan, berdaya tahan dan mampu menyokong keterjaminan makanan negara,” katanya.

Beliau berkata penyediaan kapal latihan tersebut turut memperkukuhkan peranan KPKM dalam melahirkan graduan Diploma Kemahiran Malaysia (DKM), Sijil Kemahiran Malaysia (SKM) dan Sijil Perikanan yang memenuhi standard industri serta keperluan teknologi perikanan semasa.


Aset latihan itu mampu menampung seramai 25 orang pada satu-satu masa serta akan dimanfaatkan sepenuhnya dengan kaedah pembelajaran secara 30% teori dan 70% kemahiran praktikal. Melalui latihan tersebut, para pelatih akan didedahkan secara langsung kepada keseluruhan rantai pengoperasian sebenar perikanan tangkapan termasuk pengendalian vesel, navigasi asas, operasi pukut jerut, pengendalian hasil tangkapan, penggunaan teknologi perikanan moden serta aspek keselamatan dan prosedur operasi di laut.



CERTIFIED TO ISO 9001:2015
CERT. NO.: QMS 03900



0074



CERTIFIED TO ISO 9001:2015
CERT. NO.: QMS 03900



CERTIFIED TO ISO 9001:2015
CERT. NO.: QMS 03900



PERIKANAN PRODUKTIF MENJANA TRANSFORMASI
PRODUCTIVE FISHERIES TOWARDS TRANSFORMATION

myDOF
Peneraju Perikanan

Pendekatan latihan berasaskan pengalaman sebenar di lapangan ini diyakini mampu meningkatkan kompetensi, disiplin dan keyakinan pelatih sebelum memasuki industri sebenar, sekali gus menyokong pembangunan sektor perikanan negara yang lebih moden, berteknologi tinggi dan mampan.

Malaysia merekodkan kadar pengambilan ikan per kapita sekitar 44.7 kilogram seorang setahun, antara yang tertinggi di Asia, menjadikan sektor perikanan sebagai komponen penting dalam agenda keterjaminan makanan negara.

-TAMAT-

Pautan gambar :

https://drive.google.com/drive/u/0/folders/1ueVdBN5_QE5szrwrp4OH9pM2qwJq2NEp

Dikeluarkan oleh:

UNIT KOMUNIKASI KORPORAT

Ibu Pejabat, Jabatan Perikanan Malaysia

Wisma Tani, Putrajaya

E-mel : ukk@dof.gov.my